

gefährlich sey/das ihr das Recht sampt vns sitzen möget/ so sagen Ich bey meinem Ende/das es nit zu frühe/ auch nit zu spate/vnnd der tag nicht zu Heylig oder gefährlich sey/das ihr wolt sampt vns richten / auff heutigen tag zu recht sitzen möget/auch Recht vnd Brtheil sprechen/vber alles / so für ewern stab bracht vñ angetlagt mag werden/es sey vber Silber/golt/ Leib/Ehre vnd gut.

**Nun fraget der Schultheiß die andern Elff Richter/**  
ob diß Brtheil recht gesprochen/einen nach dem andern.

### Zum Andern.

**I**ch frage dich bey deinem Ende/ ob es sach were / das man das Hochwürdige Sacrament vorüber trüge / einen Krancken zu stercken/oder würde im Läger vmbgeschlagen/das man wolt das Euangelium vnd Gottes Wort verkündigen/ob ich sampt euch möchte auffstehen/vnnd dem H. Sacrament mit dem Priester ehrerbietung thun/oder aber mit einander gehen/vnd Gottes Wort hören: Da solches geschehen / ob ich möchte wieder den stab nehmen/vnnd mit dem Rechts tag fortfahren zum Rechten.

### Antwort.

**I**hr Schultheiß/Ihr habet mich gefraget auff meinen Ende/ ob man das Heilige hochwürdige Sacrament fürüber trüge / das ihr mit vns sollet auffstehen/vnd demselben ehrerbietung thun/oder da man vmbschlüge im Läger/das Euangelium vnd Gottes Wort zu predigen/das wir sampt euch sollen auffstehen/vnd demselbelbe zuhören/Vnd da wir solches gehört hetten/vnd es noch bey guter bequemer tagzeit wehr/das ihr dan wieder den stab nemen/vnd vollführen das Recht wie vor:so sage ich bey meinem Ende/ da man das Hochwürdige Sacrament fürüber trüge/so sollet ihr sampt vns auffstehen/vnd demselben Göttliche vnd gebürliche Ehr erzeien/ Vnd sollet auch macht haben/das Euangelium vnd Gottes Wort zuhören / vnd da es noch bey guter bequemer tagzeit wehre/gleichwol macht haben/den stab in ewere handt zunemen/vñ zum Rechten gebrauchen/wie zuuor angestelt ware.

### Zum Dritten.

**I**ch frage dich/ bey deinem Ende/ ob einer oder mehr an der bang vnd im Rechten sessen/die nit redlich oder vntüchtig/ vnd nicht verständig genug darzu wehren/vnd du kennest vnd wüßtes dieselben/das du diese anzeigen/